



La bartga cun ils mats fa naufragi sin il Lago Maggiore.

FOTOS A. METTLER



Giorgio ha ina vita da chaun tar la famiglia Rossi.

Il destin dals pitschens spazzachamins sco musical

Al pe dals Churfirsten ed a la riva dal Lai Rivaun

DA CLAUDIA CADRUVI / ANR

Damaun è premiera da «Die schwarzen Brüder» a Walenstadt. Il musical vegn mussà a la riva dal Lai Rivaun ed avant la culissa pompusa dals Churfirsten. Per la tschintgavla giada vegn mussà en quest lieu in musical. Ils ultims onns han ins dà il toc «Heidi» che pli che 180 000 aspectaturs han visità. Il musical da quest onn sa basa pusè sin in roman da giuvenils da success. Lisa Tetzner e Kurt Held han scrit romans sco «Die Rote Zora». En «Die Schwarzen Brüder» descrivan ils dus auturs il destin d'in mat tessinais che vegn vendì sco spazzachamin a Milaun. Il roman è già vegnì manà si ina giada sco musical. Per las presentaziuns a Walenstadt han ins arrançò da nov ils tocs.

La premiera è vendida ora. Per tut las autres preschentaziuns enfin ils 21 d'avust survegnan ins anc cartas. In plaza custa tranter 62 e 157 francs, tut tenor categoria e di.

Il destin da Giorgio ed Alfredo

Giorio vegn vendì da ses bab al martgant Luini. Il bab è sfurzà da far quai, pertge la vatga è crappada l'enviern e la mamma ha rut ina chomma. La famiglia

na sa strusch pli co sa volver. Sin il viadi vers Milaun emprenda Giorgio d'enconuscher Alfredo. Luini va cun ils dus mats a Milaun, nua ch'els ston lavurar per lur patrunz sco spazzachamins. Els mainan ina paupra vita e ston tadlar mo beffas. La lavur è privalsa ed ils mats survivan savens mo cun cletg. In pau consolaziun porscha ad els la lia dals «fragliuns nairs» – ina profunda amicizia trantre ils pitschens spazzachamins. Giorgio po era sa confidar ad Angeletta, la figlia malsanitscha da ses nausch patrunz.

In di sa disgraziescha Giorgio en in chamin. I capita en ina chasa da signuria, nua che dr. Casella è gist sin visita. Il medi da Ligiaun spendra la vita al mat e gida suenter ils «fragliuns nairs» da mitschar dals patrunz nauschs da Milaun. Ma ils mats ston turnar en Svizra senza Alfredo che na surviva betg la fom e las murtiradas da la lavur.

Il roman «Die schwarzen Brüder» è cumparì il 1941 ed è vegnì translata en nov linguis.

Vardad istorica

Ils mats Alfredo e Giorgio n'èn betg mo in'invenziun da Lisa Tetzner e Kurt Held. Dal 13avel tschientaner enfin il

1950 han blers uffants da 6 enfin 14 onns stui bandunar il Tessin per lavurar en l'ester sco spazzachamins. La populaziun alpina dal Tessin viveva savens en paupradad. Pervi da la miseria han las famiglias tramess u schizunt vendì ils uffants sco spazzachamins en las citads talianas, en Hollanda u en ils Stadis Unids. Là stuevan els raiver sco scuas viventas giudent en ils chamins e schubregiar a maun las paraids anc chaudas. Blers dals giuvens spazzachamins èn morts da la fom, dal afraid, da malsognas u èn sa disgraziadur durant la lavur.

Las rollas principales vegnan dadas da Bernhard Viktorin (Giorgio), Janko Danailow (Alfredo), Florian Schneider (Luini), Christoph Wettstein (dr. Casella) e da Patrik Scott (Anselmo) che ha tar «Heidi» giugà il Pieder da chauras. Las emprovas per il nov musical han cumenzà ils 14 da zercladur.

Dapli infurmaziuns chattan ins sut www.dieschwarzenbrüder.ch



Dr. Casella spendra la vita a Giorgio ed empermetta da gidar er ils auters mats.



Antonio Luini va cun ils mats tessinais a Milaun, nua ch'els lavuran sco spazzachamins.



Giorgio dat adia a bab e mamma.



Anselmo Rossi, il figl dal nausch patrun, procura che Giorgio ha ina paupra vita.



Ils mats vegnan vendids en ina taverna. Giorgio ed Alfredo engiran da restar amis avant ch'els ston prender cumià.